

Ո Ր Ո Շ ՈՒ Մ թիվ- 110
Վարչական տույժ նշանակելու մասին

«29» ապրիլի 2021թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով Մոհամմադտագիի Մազլուումչելեհկհանի վերաբերյալ նյութերը.

Պ Ա Ր Զ Ե Ց Ի՝

2021 թվականի մարտի 20-ին ՀՀ ՊԵԿ ՄԴՊ-ի վարչության աշխատակիցները մաքսային հսկողության գոտում զննման են ենթարկել ՀՀ-ից ԻԻՀ մեկնող <<էլեկտրամեքենա ինժեներինգ>> ՓԲԸ-ի կողմից թիվ 05100010/180321/0013595 ապրանքային հայտարարագրով հայտարարագրված ընդհանուր 98640 կգ քաշով ապրանք, որի արդյունքում հայտնաբերվել է նաև չհայտարարագրված՝ ընդհանուր 550 կգ քաշով 100 հատ մետաղյա զսպանակ:

Փաստի առթիվ թիվ PP129DD/SS2560 պետհամարանիշի բեռնատար ավտոմեքենայի վարորդ Մոհամմադտագիի Մազլուումչելեհկհանեի նկատմամբ ՀՀ մաքսային օրենսգրքի 203-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն:

Վարչական վարույթի ընթացքում Մոհամմադտագիի Մազլուումչելեհկհանին բացատրություն է տվել այն մասին, որ իր կողմից վարվող թիվ PP129DD/SS2560 պետհամարանիշի բեռնատար ավտոմեքենայով <<էլեկտրամեքենա ինժեներինգ>> ՓԲԸ-ի անվամբ ՀՀ-ից ԻԻՀ արտահանվող ապրանքներից բացի առկա է եղել նաև ընդհանուր 550 կգ քաշով 100 հատ մետաղյա զսպանակ, ինչը պատկանում է իրեն և <<էլեկտրամեքենա ինժեներինգ>> ՓԲ ընկերությունը ոչ մի տեղեկություն չի ունեցել նշված զսպանակի վերաբերյալ:

31.03.2021թ. նշանակվել է «Ապրանքագիտական փորձաքննություն», որի կատարումը հանձնարարվել է ՀՀ «Փորձագիտական կենտրոն» պետական ոչ առևտրային կազմակերպությանը:

ՀՀ «Փորձագիտական կենտրոն» պետական ոչ առևտրային կազմակերպության փորձագետի 16.04.2021թ. թիվ 06482110 եզրակացության համաձայն՝ փորձաքննությանը ներկայացված 100 հատ մետաղյա զսպանակի շուկայական արժեքը 2021 թվականի մարտի 20-ի դրությամբ կարող էր կազմել 100.000 ՀՀ դրամ:

Վարչական վարույթի ընթացքում հարցում է կատարվել ՀՀ ՊԵԿ մաքսային հսկողության վարչություն ճշտելու 100 հատ մետաղյա զսպանակի մաքսային արժեքի և վճարման ենթակա մաքսային վճարների չափի, ինչպես նաև ոչ սակագնային կարգավորման միջոցների կիրառման առաջացման վերաբերյալ:

Մաքսային հսկողության վարչության գրության համաձայն՝ 2021 թվականի մարտի 20-ի դրությամբ ՀՀ-ից ոչ ԵԱՏՄ անդամ երկիր արտահանելու դեպքում՝ 100 հատ մետաղյա զսպանակը, ոչ սակագնային կարգավորման միջոցների կիրառում, ինչպես նաև վճարման ենթակա մաքսային վճարներ չեն առաջանում:

Մաքսային կարգավորման մասին օրենքի 73-րդ հոդվածի 2-րդ մասի համաձայն՝ Հայաստանի Հանրապետության սահմանով արտահանվող ապրանքի մաքսային արժեքը գործարքի գինն է, այսինքն՝ այն գումարը, որը փաստացի վճարվել է, ենթակա է վճարման կամ պետք է վճարվեր ապրանքը արտահանելու նպատակով ձեռք բերելու և մինչև Հայաստանի Հանրապետության սահմանը տեղափոխելու համար:

ԵԱՏՄ մաքսային օրենսգրքի 104-րդ հոդվածի 1-ին մասի 1-ին պարբերության և 2-րդ մասի համաձայն՝ ապրանքները ենթակա են մաքսային հայտարարագրման դրանք մաքսային ընթացակարգով ձևակերպելու կամ սույն Օրենսգրքին համապատասխան սահմանված այլ դեպքերում: Մաքսային հայտարարագրումն իրականացվում է հայտարարատուի կամ մաքսային ներկայացուցչի կողմից, եթե սույն օրենսգրքով այլ բան սահմանված չէ: Մաքսային հայտարարագրումն իրականացվում է գրավոր և (կամ) էլեկտրոնային եղանակով:

ԵԱՏՄ մաքսային օրենսգրքի 105-րդ հոդվածի համաձայն՝ մաքսային ընթացակարգերով ձևակերպելիս, բացառությամբ «մաքսային տարանցում» մաքսային ընթացակարգի, մաքսային մարմին է ներկայացվում ապրանքների մասին հայտարարագիր:

ԵԱՏՄ մաքսային օրենսգրքի 2-րդ հոդվածի 7-րդ կետի համաձայն՝ հայտարարատուն այն անձն է, որը հայտարարագրում է ապրանքներ կամ որի անունից հայտարարագրվում են ապրանքներ, իսկ 35-րդ կետի համաձայն մաքսային հայտարարագրումը մաքսային մարմնում մաքսային հայտարարագրի միջոցով ապրանքների վերաբերյալ տեղեկությունների, ընտրված մաքսային ընթացակարգի վերաբերյալ և (կամ) ապրանքների բացթողման համար անհրաժեշտ այլ տեղեկությունների հայտագրումն է:

ԵԱՏՄ մաքսային օրենսգրքի 260-րդ հոդվածի 14-րդ կետի 1-ին մասի համաձայն՝ որպես անձնական օգտագործման ապրանքների հայտարարատուներ կարող են հանդես գալ 16 տարին լրացած՝ անդամ պետությունների ֆիզիկական անձինք կամ օտարերկրյա ֆիզիկական անձինք, որոնք Միության մաքսային սահմանը հատելու պահին Միության մաքսային սահմանով ուղեկցվող ուղեբեռում տեղափոխվող անձնական օգտագործման ապրանքների նկատմամբ ունեն տիրապետման, օգտագործման եւ (կամ) տնօրինման իրավունք:

Օրենսգրքի 84-րդ հոդվածի 2-րդ կետի համաձայն՝ հայտարարատուն պարտավոր է կատարել ապրանքների մաքսային հայտարարագրում, նույն հոդվածի 3-րդ կետի համաձայն հայտարարատուն անդամ պետությունների օրենսդրությանը համապատասխան, պատասխանատվություն է կրում սույն հոդվածի 2-րդ կետով նախատեսված պարտականությունները չկատարելու, մաքսային հայտարարագրում ոչ հավաստի տեղեկություններ հայտագրելու համար:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային

ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ Մաքսային օրենսգրքի 203-րդ հոդվածի 1-ին մասի 1-ին պարբերության համաձայն՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում չի առաջանում մաքսային վճարների (բացառությամբ մաքսավճարի) պակաս հաշվարկում կամ չհաշվարկում, ինչպես նաև ոչ սակագնային կարգավորման միջոցների չկիրառում՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ 50 հազար դրամի չափով:

ՀՀ մաքսային օրենսգրքի 219-րդ հոդվածի համաձայն՝ մաքսային կանոնների խախտման վերաբերյալ գործը քննվում է վարչական պատասխանատվության ենթարկվող անձի մասնակցությամբ: Գործը կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Մոհամմադտագիի Մազլուումչելեհկհանին 2021 թվականի ապրիլի 29-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 203-րդ հոդվածի հատկանիշներով սկսված վարչական գործի քննությանը մասնակցելու համար, սակայն չի ներկայացել:

Այսպիսով, գործի նյութերով պարզվել է, որ, 20.03.2021 թվականին ԻԻՀ քաղաքացի Մոհամմադտագիի Մազլուումչելեհկհանի կողմից վարվող թիվ PP129DD/SS2560 պետհամարանիշի բեռնատար ավտոմեքենայում առկա 100 հատ մետաղյա զսպանակը չի հայտարարագրվել, ինչի հետևանքով չեն առաջացել պակաս հաշվարկված մաքսային վճարներ, ինչպես նաև, չի առաջացել ոչ սակագնային կարգավորման ներկայացման պահանջ, այսինքն՝ Մոհամմադտագիի Մազլուումչելեհկհանին, թույլ է տվել ՀՀ մաքսային օրենսգրքի 203-րդ հոդվածի 1-ին մասի 1-րդ պարբերություններով նախատեսված մաքսային կանոնների խախտում, ինչը հիմնավորվում է 21.03.2021թ.-ին կազմված մաքսային կանոնների խախտման վերաբերյալ արձանագրությամբ, ՊԵԿ մաքսային հսկողության-վարչության 29.04.2021թ.-ի գրությամբ, թիվ 05100010/180321/0013595 ապրանքային հայտարարագրով:

Ո Ր Ո Շ Ե Ց Ի


1. Մոհամմադտագիի Մազլուումչելեհկհանին (ծնված՝ 21.03.1984թ., ԻԻՀ, ք. Սուֆիան Բաղերխան փողոց, բն. 18) ճանաչել զանցառու ՀՀ մաքսային օրենսգրքի 203-րդ հոդվածի 1-ին պարբերությամբ և նրան տուգանել 50.000 դրամ:

/վճարումը՝ 900005024055 հաշվեհամարին կող 19/:

2. Վերցված ապրանքը կարող է վերադարձվել տուգանքի վճարումից հետո՝ մեկ աշխատանքային օրվա ընթացքում:

3. Որոշման մասին հայտնել Մ.Մազլուումչեհկիանին՝ պարզաբանելով, որ ՀՀ Մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ Մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ դա կայացնելուց հետո 10 օրվա ընթացքում կամ ՀՀ Վարչական դատարան երկու ամսվա ընթացքում

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՅԱԿԱՆՅԱՆ